

〔駿府志略〕興替

府城安倍氏墟後爲州治並不詳其時世至建武二年今川範國始封駿遠二國範國居遠府今見附驛也卒壽八十七諡省公子範氏立徙居本州華倉里卒壽五十諡慶公子泰範立卒壽五十五諡高公子範政立始居本府嘉吉二年卒壽七十八諡全公子範忠立多力善射寬正二年夏五月五日卒壽五十四諡賀公子義忠立文明七年夏四月西伐橫瀨氏敗死諡昌公邦內大亂關東帥足利氏滿遣兵來討立義忠子氏親氏親西伐報父讐遂併參河大永六年夏六月卒壽五十四諡僖公子氏輝立天文五年夏四月卒諡玄公弟義元立永祿三年夏五月率師四萬西伐織田氏敗死桶狹時年四十四諡哲公子氏真立奢侈無度邦人大畔十一年冬爲武田氏所攻出走今川氏建國二百三十四年首乙亥盡戊辰武田信玄以永祿十一年入駿河明年春與北條氏相持薩埵山凡百餘日北還冬十月復南伐盡有駿地修橫山江尻田中等諸城分戍諸將天正元年春信玄大舉西伐卒于師子勝賴立十年夏烈祖川家

康與織田氏夾攻滅勝賴武田氏有駿十四年首戊辰盡壬午

烈祖以天正十年併駿河越四年營府城遷居焉十八年秋東遷豐公以本府封其將中村一氏食十四萬石慶長五年秋卒子忠一立冬烈祖徙忠一子伯耆以本府賜韭山城主內藤信成十一年夏徙信成於江之長濱明年秋七月烈祖再遷焉又二年己酉冬封八子賴宣於遠之橫沙食駿遠二國賴宣年幼未就封元和二年烈祖薨賴宣遂居本府五年移封紀伊台廟德川秀忠二子忠長代封忠長以寬永九年謀反賜死爾後置留守

國府

〔倭名類聚抄五國郡〕駿河國國府在安倍郡行程上十八日下九日

〔伊呂波字類抄須國郡〕駿河國略中安倍府ア

〔駿府志略〕襍記 國府或云在廬原或云在藤枝或云今府即古國府或云厥初在廬原後徙藤枝又徙今地其說不一府人新莊雄曰駿河本四國廬原自有廬原國府安倍自有安倍國府此說似是